


02 IANUARIE / 19 IULIE

**ACATISTUL
SF. CUVIOS
SERAFIM
DE LA SAROV**



ACATISTIERUL PE IANUARIE-RU



Акафист преподобному и богоносному отцу нашему Серафиму Саровскому чудотворцу

Кондак 1

Избранный Чудотворче и предивный Угодниче Христов, скорый помощниче и молитвенниче о душах наших, Преподобне отче Серафиме, величающе прославльшаго Тя Господа, похвальное воспеваем Ти пение; Ты же имеяй велие дерзновение ко Господу, Владыце небесе и земли, от всяких нас бед свободи зовущих: Радуйся, радости наша, Преподобне Серафиме, отче наш.

Икос 1

Ангелов Творец избра тя изначала, да прославиши житием Твоим пречудное имя Святыя Троицы. Явился бо еси воистинну во плоти Серафим и Ангел на земли. Яко лучь пресветлый вечнаго Солнца правды, просветися житие Твое. И мы, трепетом и радостию одержимии, зряще на прехвальныя труды твоя, глаголем ти сицевая: Радуйся, пречудное Ангелов удивление Радуйся, грозное бесов поражение.

Радуйся, преславное верным величание.
Радуйся, претихое скорбным утешение.
Радуйся, прелюбимое иноков похваление.
Радуйся, живущим в мире предивное
поможение.
Радуйся, Русския Державы славо и ограждение.
Радуйся, Тамбовския страны священное
украшение.
Радуйся, радости наша, Преподобне Серафиме,
отче наш.

Кондак 2

Видящи мати твоя, преподобне отче наш
Серафиме, теплую любовь твою ко иноческому
житию, позна святую волю Господню о тебе, и
Богу, яко дар совершен принося, благослови тя
отче, на тесный путь иноческий святым своим
крестом, его же до конца дней твоих на персех
носил еси, знаменуя тем велию любовь твою к
распешнемуся за ны Христу Богу нашему, Ему
же вси со умилением зовем: Аллилуиа.

Икос 2

Разум небесный тебе даровася, Святче Божий от
юности твоя; чудесно исцеленный в недуге, от
чудотворных иконы Богоматери, не престая
помышляти о небесном, оставил еси дом свой,
ища царствия Божия и правды Его. Сего ради,
приими от нас похвалы сия:

Радуйся, на подвиги от матери, крестом
благословенный.

Радуйся, благословение сие, яко святыню соблюл
еси.

Радуйся, добродетели Матери своея
унаследивый.

Радуйся, благочестию и молитве ею наученный.

Радуйся, от юных лет по Бозе возревновавый.

Радуйся, родителей благочестивых отрасли
пречестная.

Радуйся, любви ради Господа, дом отечский
оставивый.

Радуйся, от юности твоея возлюбленный
Господом.

Радуйся, радости наша, Преподобне Серафиме,
отче наш.

Кондак 3

Силою Вышняго видим тя воистинну от юности
хранима. С высоты бо превелией спадша
сохрани тя Господь неврежденна, и страждущу
люте Сама ти Владычица мира явися, с небес
исцеление принеши, зане измлада верно
служил еси Богу, выну взывая Ему: Аллилуиа.

Икос 3

Имея тщание о подвиге иноческаго,
равноангельскаго жития, к матери Русских
градов, во святой Киев притекл еси вопрошити

Богомудраго старца Досифея о путех своих. И прияв от него благословение в пустыни Саровстей вселитися, верою издавеча облобызал еси место святое сие. Тамо бо, рекл оный старец обрящещи спасение и скончаеши земное странствование свое, еже и совершися о тебе Божественным промышлением. Мы же, Радуйся, глаголем, яко благое иго Христово на себе восприял еси.

Радуйся, миру навсегда умерый.

Радуйся, яко небеснаго отечества пламенне возжелел еси.

Радуйся, ум свой и сердце в Бозе молитвенно утвердивый.

Радуйся, в подвизех служения БОгу неутомимый.

Радуйся, яко смиренне преклонил еси волю свою в послушание Христово.

Радуйся, во благочестии неохладимый.

Радуйся, Христа всем сердцем возлюбивый.

Радуйся, радости наша, Преподобне Серафиме, отче наш.

Кондак 4

Бурю злых помыслов в душе твоей утишая, прошел еси весь путь тесный и прискорбный подвига иноческаго, несый ярем пустыннаго жития, многонощнаго бдения, молчания и затвора, и тако благодатию Божиею восходя от

силы в силу, от деяния к боговидению,
преселился еси в обители горния, идеже со
Ангелы поеши Богу: Аллилуиа.

Икос 4

Слышаще и видяще святое житие твое,
преподобне отче наш Серафиме, вся братия
твоя удивляхуся тебе и, приходяще к тебе,
поучахуся о словесех твоих и подвизех, славяще
Господа, дивнаго во святых Своих, и мы вси, с
верою и любовью сошедшеся днесь у
многоцелебных мощей твоих, восхваляем тя,
преподобне отче, и вопием ти сице:

Радуйся, воине Христов, мужественный и
добропобедный.

Радуйся, рабе благий и верный Небеснаго
Домовладыки.

Радуйся, яко всего себе принесл еси в жертву
живу, святу и богоугодну Господеви.

Радуйся, яко сподобился еси посещения
Богоматере со Апостолы.

Радуйся, на высоту безстрастия возшедый.

Радуйся, пречуднаго благоухания крине
пустынный.

Радуйся, молитвенниче неусыпный.

Радуйся, горлице пустыннолюбивая.

Радуйся, радости наша, Преподобне Серафиме,
отче наш.

Кондак 5

Божественный свет осия келию твою, егда болящу ти и на одре смертнем лежащу, сама Пречистая Дева посети тя со Святыми Апостолами Иоанном и Петром, и нарече тя сущим от Ея рода и коснуся главе твоей. И абие исцелев, воспел еси благодарне Господу: Аллилуиа.

Икос 5

Видя враг рода человека чистое и святое житие твое, преподобне Серафиме, восхоте погубити тя, наведе на тя людие оные, злые, иже беззаконно истязашу тя и еле жива суща оставиху. Ты же, святой отче, яко агнец кроток, вся претерпел еси и от всего сердца твоего молился за обидящих тя. Темже мы все, таковому твоему незлобию дивящися, вопием ти: Радуйся, незлобием твоим духа злобы победивый.

Радуйся, в кротости и смирении твоём Христу Богу подражавый.

Радуйся, образу истиннаго смирения.

Радуйся, правилу христианскаго терпения.

Радуйся, добрый подвижниче благочестия.

Радуйся, чистоты душевныя и телесныя усердный хранителю.

Радуйся, наставниче монахов предивный.

Радуйся, обители Саровския удобрение и славо.

Радуйся, радости наша, Преподобне Серафиме, отче наш.

Кондак 6

Проповедует пустыня подвиги и труды твоя, богоносне угодниче Христов, дебри бо и леса ея молитвою облагоухал еси, пророку Божию Илии и Крестителю Господню Иоанну подражая, и явился еси пустыни прозябение многоплодное дарами Духа Святаго, Его же действием многая и преславная совершил еси, подвизая верных славословити благих подателя Бога: Аллилуиа.

Икос 6

Возсия новый Боговидец, Моисею подобный в тебе, Серафиме блаженне, яко служение алтарю Господню совершая, сподобился еси зрети Христа, во храме со безплотными силы грядуща. Сему Божию благоволению о тебе дивящися, воспеваем ти сице:

Радуйся, Боговидче преславный.

Радуйся, Пресвятая Троицы верный служителю.

Радуйся, Духа Святаго жилище украшенное.

Радуйся, избранниче Божий.

Радуйся, в брэнном телеси райскую сладость предвкусивый.

Радуйся, светом трисиянным озаренный.

Радуйся, яко Христос телесному оку твоему явился.

Радуйся, яко на мног час умолкла еси,
неизглаголанному видению дивяся.

Радуйся, яко на вящшие подвиги разгореся
тогда сердце твое.

Радуйся, радости наша, Преподобне Серафиме,
отче наш.

Кондак 7

Боготечней звезде, древле волхвы к родшемуся
солнцу правды Христу путеводившей, уподобити
тя дерзаем, преподобне отче, ибо светило
богосветлое воистину был еси, дела и словесы
твоими всех приводя ко благочестию и любви
Божией. Темже сиянием подвигов твоих
просвещеннии и хлебом учения твоего
насыщеннии, тебе усердно величаем и
прославльшему тя Христу вопием: Аллилуиа.

Икос 7

Новаго видяще тя избранника Божия, издавеча
притекаху к тебе вернии в скорбех и болезнях. И
сих беды отягченных не отринул еси, источая
целения, даруя утешение, предстательствуя
молитвы. Темже исхождаше во всю землю
русскую вещание чудес твоих, и сие ты славяху
духовныя твоя чада:

Радуйся, добрый наш пастырю.

Радуйся, отче милостивый и кроткий.

Радуйся, немощи наша любовью покрываяй.

Радуйся, в бедах и обстояниях скорый помощниче.

Радуйся, душ смятенных умирителю.

Радуйся, яко грядущая обнаженна тебе.

Радуйся, яко зриши сокровенная и тайная сердце наших.

Радуйся, врачу скорый и благодатный.

Радуйся, благий покровителю вдовиц и сирых.

Радуйся, радости наша, Преподобне Серафиме, отче наш.

Кондак 8

Странное чудо: како старец немощный и притрудный тысящу дний и тысящу ночей, на камени неусыпая в молитве пребывает. Кто доволен изреци болезни и борения твоя, блаженне отче, яже претерпел еси, воздея преподобныя руце твоя к Богу, Амалика мысленнаго побеждая и Господеви поя: Аллилуиа.

Икос 8

Весь еси желание, весь - сладость, сладчайший Иисусе, и что ми есть не небеси или что восхощу на земли, точию Тебе возжада душа моя, - сице взывал еси отче в пустынном безмолвии твоём. Мы же суетою помраченнии и во гресех все житие иждившии, что принесем тебе, преподобне, восхвалити тя хотяще:

Радуйся, пустынный жителю и в телеси ангеле.
Радуйся, совершенный в добродетелех человеце.
Радуйся, предивный затворниче и умный молчальниче.

Радуйся, огнем молитвы стрелы вражия попаливый.

Радуйся, свеще неугасимая, молитвою в пустыни пламенеющая.

Радуйся, пресладкий любимиче Божия Матере.

Радуйся, светильниче, выну светяй даровании духовными.

Радуйся, радости наша, Преподобне Серафиме, отче наш.

Кондак 9

Все естество Ангельское удивися странному зрению: старцу бо сущу в затворе, небеси и земли Царица явися повелеваючи, да откроет затвор свой и да не возбранит людем православным внити к себе, но да всех пети научит Христу Богу: Аллилуиа.

Икос 9

Всею крепостию твоею повеление Прествятия Богородицы исполняя, предал еси себе на служение всем приходящим к тебе, и был еси недоумевающим советник благий, унывающих утешитель, заблуждающихся кроткое вразумление, болящих врачь и целитель. Бысть

любовь твоя к ближним о Христе, яко пламень огня всякое ожесточение сердец умягчай. Сего ради вопием ти:

Радуйся, яко от мира в пустыню утекл еси, да добродетели приобретаеши.

Радуйся, яко из пустыни во обитель изшел еси, во еже семена добродетели сеяти.

Радуйся, яко чадолюбивый отец коемуждо пришедшу к тебе явился еси.

Радуйся, яко вси в радость вменяху единый лик твой точию видети, Духа Святаго благодатию осиянный.

Радуйся, яко послушая смирения своего вся притекющая к тебе поклонением даже до земли предварял еси.

Радуйся, яко словесами кроткими "радость моя", "сокровище мое" души пришедших утешал еси.

Радуйся, всех верных радости и похвало.

Радуйся, Божественными словесы велие утешение всем подающий.

Радуйся, радости наша, Преподобне Серафиме, отче наш.

Кондак 10

Пение Пресвятей Троице деннонощно принося,
преподобне отче, на молитве
коленнопредклоненно, поя победныя песни
Воскресшему Господу, предал еси святую душу
твою в руке Божии, юже Ангели святии

вознесоша горе ко престолу Вседержителя, да со всеми святыми предстоиши во славе невечерней, воспевая песнь хвалебную святых Святейшему Слову: Аллилуиа.

Икос 10

Стена всем святым и иноком отрада Пресвятая Дева, пред концем твоим посети тя, показующе, яко благоугодил еси Господеви, и милостиво прорече: не по мнозех днех, любимиче мой, с нами будеши: темже дивяся таковому посещению Богоматери, вопием ти: Радуйся, явлением Божией Матери обрадованный.

Радуйся, лицезревый Царицу небесе и земли.

Радуйся, от Нея весть к преселению небесному приемый.

Радуйся, в час кончины твоея сиянием небесным облистаный.

Радуйся, в молитве пред иконою Богоматери умиленный дух твой Богу предавый.

Радуйся, в молитвенном бдении, яко воин Христов, час кончины встретивый.

Радуйся, мирным и благочестным успением твоим Бога прославивый.

Радуйся, яко вшел еси в радость Господа Твоего.

Радуйся, радости наша, Преподобне Серафиме, отче наш.

Кондак 11

Спастися всем и в познание истины приити хотяй, Господь яви тя подвижника велика в позднейшая наша лета, заблуждающим на вразумление, болящим душею и телом на исцеление "весть бо Господь", по слову премудраго, "воздвизати праведника во время свое". Мы же, благодарни суще за таковую милость Его к нам, выну зовем Ему: Аллилуиа.

Икос 11

Яко светозарное светило в православней Русстей земли возсиявша зрим тя, Богомудре отче, от честных бо мощей твоих источаеши неисчерпаемые токи чудес: хромии ходят, слепии видят, немии глаголют, глусии слышат, бесы изгоняются, рuce расслабленныя укрепляются, маломощныя и страждущия здрави бывають. И ныне предстоя престолу Пресвятыя Троицы, видиши вся наша нужды и прошения, и нам помощь подаеши обильно, вопиющим ти таковая:

Радуйся, Преславное Святыя Троицы похваление.

Радуйся, духом любви твоея николиже от нас отступивый.

Радуйся, яко жив сый, утешение всем требующим помощи подаеши.

Радуйся, яко и ныне присно чудесное

пришествие твое от небесных к земным являеши.

Радуйся, болящих и недужных исцелителю.

Радуйся, источнике чудес неоскудевающий.

Радуйся, кладязю неисчерпаемый воды многоцелебных всем с верою к тебе притекающим.

Радуйся, яко вси концы земли нашае любовью твоею объял еси.

Радуйся, радости наша, Преподобне Серафиме, отче наш.

Кондак 12

Благодать и велие твое дерзновение пред Богом ведуще, тебе чадолюбиваго отца прилежно просим: пролей ныне теплую молитву твою о нас грешных ко Господу, да дарует Императору нашему победы на враги, да хранит и прославит православное отечество наше, Церковь Свою Святую от неверия и раскола да соблюдет, и нас всех православных христиан да помилует, и по заповедем святым Своим жити научит, вопиющих: Аллилуиа.

Икос 12

Поюще твое прославление, что тя наречем, Святче Божий. Многая твоя имена, но большая дарования; ублажаем тя яко преподобна, молим тя, яко многомошна молитвенника пред

Господем: не забуди нас чад твоих и сохрани страну нашу от врагов видимых и невидимых, да зовем ти:

Радуйся, защитниче наш, и покровителю, и присный заступниче.

Радуйся, молитвенниче о нас теплейший, праведный гнев Божий на нас утоляющий.

Радуйся, отечеству нашему щит и ограждение.

Радуйся, крепкий наш пред Богом предстателю.

Радуйся, силою Божиею многая чудеса содеявый.

Радуйся, ризою твоею многия недужныя исцеливый.

Радуйся, путеводителю всех, к небеси направляяй.

Радуйся, в грозный час смерти всем нам прибежище и заступление.

Радуйся, радости наша, Преподобне Серафиме, отче наш.

Кондак 13

О, предивный угодниче и великий чудотворче, преподобне отче Серафиме, прими ныне малое сие приносимое тебе моление, хвалим милосердие твое, не таим благодеяний, яже обильно излил еси на нас. И ныне, предстоя престолу Царя Царствующих, Господа нашего Иисуса Христа, не забуди нас, сырых и убогих, в молитве своей, помяни нас, да обрящем

милосердие Его в день судный, поя Ему:
Аллилуиа.

[Трижды, Таже чтется Икос 1 и паки Кондак 1]

